



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma : Tir Yimyim

tiryimyim@aolima

tir yimyim

TAPAK 7

Novak-i otsüsüsusa Monte Carlo nung
77buba Masters semi tongtetogo

Hezbollah-i Israel dak
rocket aika khaloktsüogo

VOL. XXI ISSUE NO. 181 (ADOK 181) DIMAPUR AMUNGNÜ (SUNDAY) RONGCHII (APRIL) 14, 2024 ₹ 5.00

CEO Nagaland-i Voter Information Slip indang metetdaksür

Dimapur, April 13, 2024 (TYO): 2024 Lok Sabha elections mapang Nagaland nung temelenshi tulu ka alitsü aser ibaji voter identity kuli ka ama Voter Information Slip mamshiba asütsü.

Voter Information Slip ya nisungtem dang parnok polling station indang electoral roll nung serial number, polling anogo, mapang amala metetdaksütsü atema alerem ta Chief Electoral Officer Nagaland-i metetdaksüogo.

Electors Photo Identity Card (EPIC) alirtemi Polling station nung vote meinoktsüdang tamasa EPIC sayutsüla ta CEO Nagaland-i ashi.

Maneni, EPIC malirtemi tsüinglangen agüja aliba photo identity documents bener arutsüla ta paisa metetdaksü.

1. Aadhaar Card;

- MNREGA Job Card;
- Passbooks with photograph issued by Bank/ Post Office;
- Health Insurance Smart Card issued under the scheme of the Ministry of Labour;
- Driving License;
- PAN Card;
- Smart Card issued by RGI under NPR;
- Indian Passport;
- Pension document with photograph;
- Service Identity Cards with photographs issued to employees by Central/ State Govt. PSUs/ Public Limited Companies;
- Official Identity Cards issued to MPs/ MLAs/ MLCs; and
- Unique Disability ID (UDID) Card, M/o Social Justice & Empowerment, Government of India.

DGCAKT-i Kibalembu indang sobaliba sentong ayongzük



Senden Riju Dimapur nung DGCAKT purtemi ayongzükba sobaliba sentong nung kaketshirtemi shilem agiba noksa nung angur (April 13, 2024).

Dimapur, April 13 (TYO): Aotsür Aor Kibalembu indang angazüktsü asoshi sobaliba sentong ka Dimapur Govt. College Ao Kaketshir Telongjem (DGCAKT) purtemi Senden Riju nung tanü Küptoknü tantsü tamurtem jaoka agiogo.

Iba sentong nung sentong akhümdong MW Enterprises nung Managing Director aser Mendenbuba Wb. Moa Walling liasü aser taoba Deputy Commissioner (Judicial) Wb.L.Sosang Jamir tongti o jembir liasü.

Iba sobaliba sentong nung lanurtem ayongzükba jembidang, "nisung shiai pei taküm nung Tsüngrem nükjidong angatetsüla aser Tsüngremi teti asenok repringdagi ta mamadoktsüla," ta Wb.Moa Wallingi metetdaksü.

Education anguba ya jenjang tuluka lir, anungji zünga-shia metetba 'educated' nisung ka asoshi mapa inyaksü manguba tebilemsü malitsüla ta paisa ashi. Zünga shia metetba shisaliok agi nisung ka taküm nung tajung aser majung na bendangteter. Iba tashiji amshia pei aliba lokti aser alima tajungba kuma yanglushitsü asoshi paisa lanurtem ajungshi.

Iba sentong onük jembir, Wb.L.Sosang Jamiri "Aotsür

Aoer Kibalembu" indang kaketshirtem den lemsatepdang, "Ao kin sobaliba nung kasa kin aser kasa kidong nungi asangur ka aser aiür ka lembutsübaji memelar," ta metetdaksü.

Kodang tetsür chanu ka aiür kümdir, la tsürabur kidang melii lar kidong amitsür ka kidang oa ayiptsü aser idakji teptsü atep tenzüksü. Teptsüji tamasa tetsüng temola nung atepsü aser külen teko nung, iba sülen temokok aser temaküp nung, iba sülen teküm, iba sülen tepen anatsülen aser tesüsa jangmo atepsü. Iba amaji teptsü abensaa teper külenang la keyii aotsü akok ta tebu tedi L.Sosang Jamiri ashi.

Ano, teburtema kodang asangur kuma intir, pei tsürabur ki toktsür ariju nung ayiptsü aser yangji taküm nung nungdakba mapatem ajak angazükter külenang kibong akümstü ta paisa metetdaksü.

Tanü iba sentong nung Ao Senso Telongjem Dimapur aser Ao Kaketshir Telongjem Dimapur nungia tajungshi o jembia liasü. Iba sobaliba sentong nung kaketshirtemi jilushi aiba, yar tsüngsangba, sobaliba ken atenba, Zülumen toktepa aser noksa agiba aser atepba mapatem indang nung shilem tajung agia liasü.

PM Modi lenisüba kübok Northeast melenshir: J P Nadda



Dimapur, April 13, 2024 (TYO): Prime Minister Narendra Modi-i mangdang tulu yur len aniba ajanga Northeast kanga melenshir ta BJP National President J P Nadda-i ashi.

Agri Expo, Chumoukedima nung Honibarnü People's Democratic Alliance (PDA) consensus candidate Dr. Chumben Murry atema NDA rally nung jembidang "Modi-i Northeast atema mangdangji 'Act East' dang masü saka 'Gateway to South Asia and East Asia' kümdaktsütsü asoshi temulung agütsür" ta Nadda-i ashi.

Modi-i politics sobaliba, politics tetezü, politics inyaksangshi aser politics maparen melenshiogo. Congress yimsüsüba kübok Northeast nung 'Divide and Divide and Divide' liasü saka BJP-NDPP yimsüsüba kübok Northeast ya a 'DevINE model' melenshiogo ta J P Nadda-isa ashi.

"NDA sorkari Naga yimtenren teloktem den Framework Agreement aser Agreed Position nung sign sütepa ajanga Naga yimten tebilemsü temaba jenjangi tuogo"

ta Nagaland Chief Minister Neiphiu Rio-i ashi.

Nagaland nung political party ajak Naga yimten latetsü atema longjemogo aser iba ya BJP-i aniba NDA sorkari dang inyaktetsü. Election agiba sülen state political affairs committee-i civil societies aser Naga yimten teloktem den telemtetba ka agütsü atema jembitsü, ta CM Rio-i ashi.

Paisa ENPO dang Lok Sabha elections nung shilem agütsü ayongzük. "Centre nung sorkar akümba sülen iba dak sendakba onüktem jembitsü kechiyong Nagaland state nung yimjung aser terenlok alitsüla" ta Rio-i ashi.

NDPP aser talisa BJP-i linük nung nübo agi tangar memenepertem ajembanga ayur ta opposition Congress party-i aitsür. Ajsütaka, BJP-i state 18 nung political party tilatem den tesentaktep ayuba ajanga BJP-i nübo agi tangar memenepertem asoshi bilemsüba sayur, ta paisa metetdaksü.

Tanga party yariba ajanga secularism pusemba sayur aser democratic party tulutiba ta asüba jangjar, ta CM Rio-isa

Nagaland state sorkari Naga nung külem taginübatem indang ola adoktsü atema opposition maliba sorkar alitsü lemetet ta Nagaland Deputy Chief Minister Y Patton-ia ashi.

Nagaland nung PDA sorkari Centre nung NDA den tesentaktep lir aser tesüiba küm 20 tashi külemi kati ka dak temulung lemtepa inyaka arur, ta BJP Legislature Party leader Patton-isa ashi.

Patton-isa nübortem dang PDA candidate Dr. Chumben Murry nem vote enoktsütsü aser Centre nung sorkar nung shilem ka asütsü ayongzük.

"Ni regional sabang NDPP nungi noktaker aser NDPP ya Naga nung maitsü atema lir. Nagaland nung MLA 60 prong Naga yimten latetsü asoshi longjemogo aser iba ya Naga nung ajak atema kanga tongtipang lir" ta PDA consensus candidate Dr. Chumben Murry-i ashi.

MLA 60 külemi loktepa ya tashi sayutsü atema dang masü telongjem atema lir, ta Dr. Chumben-isa ashi.

Congress government-i Missionary-tem aridok: Metsübo

Mkg. April 13 (TYO): Yashi Mokochung district kübok Mongoya assembly constituency nung BJP aser NDPP telok nati anir PDA telongjemi Lok sabha tatar menden atema tokteptsü asoshi shimtetba candidate Dr.Chumben Murry asoshi nüboyimba sentong ka nung nübortem den jembidang, "tanü Congress aser Khristantem telok kari NDPP aser BJP teloktem ya Khristan yimsü anemer telok amai aija jembibaji kasa Khristan purtem mezüngmeshia jembiba o ka lir, kechiyong India yimten nüchiso ngur 1950s nung Congress teloki India nung yimsü asüidang America nungi aruba Khristan missionary-tem aridok aser Nagaland nungi dena Khristan missionary-temji

sayutsüngi mesüdaktsüi par limai meyipa yok," ta RD & SIRD minister Wb.Metsübo Jamiri metetdaksü.

"Nagaland nung atalokba item arogo otsütemji tanübo arogo lenirtemi amadokogo,ajisüaka tamalen Congress mapang Khristan missionary-tem anema inyakba mapatemji bilemdangra, Congress telokang Khristan anemertem asütsü," ta paisa ashi.

India yimten nüchiso ngur külen Congress teloki yimsüsü tenzükdang, Naga nung lima ya külen India aser külen Burma nung ta alima ana kuma lemdanga yutsü aser Nagaland state akümdanga Naga nung li India kübok aliba Arunachal, Manipur aser Assam state-tem kübok alitsüsa lemsüktsü. Iba

dang masü Naga lima nung 'grouping' asütsü tenzüka Naga nung reshikangshiba mapatem ajak to Congress mapang inyakba mapatem liasü ta Wb.Metsübo-isa tamalen center nung Congress government alidang Naga nung Khristan-tem anema inyakba mapatem metetdaksü.

Paisa Congress election manifesto nung atsüapong kasa apuanisa alitsü tetemen bushiba telok LGBTQIA+ asoshi inyaksü ta alibaji Naga nung arogo lenirtemia koma bilemer ta aija metetdaksü.

Iba kasa senden nung paisa nübortem dang tamalen ama NDDP teloki aniba PDA telongjemi shimtetba candidate yaritsü ayongzükba liasü.

Aor Sannükertemi BJP aser RSS purtem mapa aitsür

Dimapur, April 13 (TYO): Tanü asen kin nem nüchi agütsüba Khristan yimsü lendong aser amokmeren tulu nung lir. 2014 küm nungi India nung BJP aser RSS ajanga yimsü asütsü tenzüker Yisu dak amangba purtem jenti reshikangshi tia nung lir ta tanü sangdong ka ajanga Ao Baptist Pastors' Fellowship ajanga

metetdaksüogo.

"2023 küm tenzüker mezüng ita 8 tsüngda nung Yisu dak amanger reshikangshiba 525 ben tashi ataloka liasü aser tanü pastor-tem aika tepuokdak balala nung lir," ta parnokisa metetdaksü.

"Iba tebilemsü agi asenok amokmerendang, Yisu dak amanger ka ama asen teinyaktsü

tulu lir, Naga lima nunga Lok sabha election April 19, 2024 nü agütsü lir. Iba election nung Yisu dak amanger reshikangshiba telok nungi asen lima, asen nübor aser India lima ajanga kümzüka ayutsü ne senti vote dak tashi tulu lir," ta Aor Baptist Sannükertem Telongjemisa metetdaksüogo.

Mokokchung Police-i miim mozü shibelena ayoker aser achir 3 apu



Imotiba, Nungshiyanger aser Sarenba Aier par asem ket nungi ngutetba Sun Flower(Brown Sugar) noksa.

Mokokchung, April/Rongchii 13 (TYO): Yimyu Ward Mokokchung nung April 12 aonung 10:00 ako meta Mokokchung Police-i Sun Flower(Brown Sugar) sen 100000 tema shi jenjang apu. Sun Flower(Brown Sugar) sen 100000 tema shi jenjang ya

Yimyu Ward nung tangar kidang sen para(rent)agüja house no 23 nung alir arishi küm 46 tain Mongsenyimti nung Asür Shilumeren jabaso Imotiba, Anentsübo Sector Mokokchung Village House number 302 nung alir Asür Akangmar jabaso arishi küm 58

Nungshiyanger aser ano Artang Ward Mokokchung House number 222 nung alir arishi küm 54 tain Mupongchuket nung M.Rongsentoba Aier jabaso arishi küm 54 tain Sarenba Aier par asem ket nungi bena lia Mokokchung Police-i apu.

Par asem rongnung Yimyu Ward nung alisang Mongsenyimti nung Imotiba ya Sun Flower (Brown Sugar) belena ayoker tetsüti ka ta jangjaogo. Police-i parnok dang asüngdangyaba mapang nung Nungshiyanger-i Imotiba dang alizük aser Nungshiyanger-i Sarenba Aier dang ayokba putet. Par asemprong ya sorkar mapa inyaker(Govt. Servant) ta jangjaogo.

Yimyu Ward Chairman Bendangwati ajanga Mokokchung nung aliba ward-tem ajak nung nübürtem kanga dang chiraperaa item miim mozü shibelena ayoker aser achir mita alitsü nungtakerta lemsatop.

Nübürtemi kodangsa item ama nübür tia tamajung leni anisaba mapa inyakba ya metetdir tekaratiba nung yimden aser Police nem osang agütsütsü nungtaker ta Yimyu Ward Chairman Bendangwati-isa lemsatop.

Manipur: Imphal East nung nisung ana tepset; asem yiru

Imphal, Rongchii/April 13 (Agencies): Honibarnü Imphal East aser Kangpokpi district na arrtsü nung telok ana khatapba sülen nisung ana khasetogo.

Khatapba lendong nung asüba nisung ana ket nungi AK 47 rifle ka aser injang ishika ngutetogo.

Iba lendong nungsa state forces indang bulletproof gari ana raksaogo, ta ketdangsurtemi metetdaksü.

Honibarnü anepdang 8:30 ako nungi 11 ako tashi Imphal East district kübok Itham Moirangpurel yimtsüng aser Kangpokpi district kübok Kamu Seijang yimtsüng na arrtsü nung telok ana khatapba liasü.

Ozüng alema inyaksangshiba tribal tem aser iba Meitei yimtsüng nungi volunteer tem khatapba ya state forces iba tesem tonga aoba sülen anena liasü.

Osang ajanga ashiba agi, tribal tem ya Kamu Seijang Kuki hill len nungi alu aser Itham Moirangpurel nung Meitei nung yimtsüng tatembangbuba ya maka liasü.

Meitei nung volunteer temia meyiper parnok dak injang khalokja liasü.

State police commando tem iba tesem tonga aoba sülen yimtsüng amakertem ya jena ao aser parnok Kamu Seijang Kuki yimtsüngi meyipa ao.

Osang ajangsa, iba lendong nung asürtem maitsü ano mejangjai lir aser parnok ket nungi ngutetba prangbong aser injang ya ken o dak sendakba aliba police station nem bendanga agütsüogoo.

Maneni Hokolbarnü Thobual district kübok Ishingchaibi aser Tengnoupal district kübok Pengang Kuki yimtsüng temeket nung khatapba sülen Meitei nung volunteer asem tashi yirua liasü.

Manipur nung kin o kin na tsüngda 2023 küm May 3 nü nungi tenzüka tang tashi mangatetep adoka arudar aser tang tashi nung nisung 222 dak tema süogo.

AR-i "A Day with Coy Cdr" sentong ayongzüka agi



Dimapur, Rongchii/April 13 (TYO): Kohima nung Assam Rifles-i April 13 nü Charlie Hill nung Christ King Higher Secondary School kaketshirtem atema "A Day with Coy Cdr" sentong ayongzüka katsüogoo.

Iba sentong ya "Building Team Spirit" omen nung ajemdaker agi, kong Christ King Higher Secondary School nungi kaketshir 80-i shilem agia liasü.

Sentong nung tanü lima nung teamwork aser lenisüba koda tongtibang iba dak

rangloker sentong balala ayongzüka agia liasü. Kaketshirtem nem sendaktepa inyaksü, team züngsemtem dak metaloktsü, kanga junga tongteprateptsü aser team yangertsü atema tongtibang inyakyimtem dak sendakba nung tangazükba agüja liasü.

Sentong nungsa, lendong mapang taküm kümzüksü asoshi tasatem unit medical officer temi lecture aser inyakyim balala ajanga tangazükba agütsü.

Iba sentong ajanga kaketshirtem taküm nung takok ngua aotsü asoshi parnok tashi amshitsü aser inyakyim balala ajanga team tanüla renloka aotsü atema tangazükba agütsüogoo.

Maneni iba sentong ayongzüka katsüba atema kaketshirtem aser tesayurtemi Assam Rifles dang kanga pelaba lemsatopogo aser iba ajanga security forces aser nübürtem tsüngda tesendaktep tali takangba kumdaksütsü asoshi teyari agütsüogoo.

Kohima DC-i postal ballot indang metetdaksü

Dimapur, Rongchii/April 13 (TYO): Deputy commissioner aser DEO Kohima Kumar Ramnikant IAS-i sangdong ka ajanga, Absentee Voters Essential Services (AVES) category atema Postal Ballot ya April 15, 16 aser 17 nü 10:00 ako nungi tenzüka nikongtsütsü 4:00 ako tashi cast asütsü ta metetdaksüogoo.

Iba atema Postal Voting Centre (PVC) ya Deputy

Commissioner Office complex Kohima nung DB Court nung amenoka lir, ta kasa sangdong ajanga metetdaksü.

Anungji AVES category kübok aliba personnel tem shirnoki Postal Ballot ajanga vote agütsütsü atema apply süogo, parnok dang iba osang temulungdang yur temalen shima aliba anogo parnok indang vote agütsütsü metetdaksüogoo.

Election atema sota aliba taxi tem IG stadium-i arutsü metetdaksü

Dimapur, Rongchii/April 13 (TYO): Taruba Lok Sabha General Election 2024 atema renemshiba mapang,

Representation of People Act 1951 nung section 160 kübok agüja aliba tashi amshia 1-Nagaland Parliamentary Constituency nungi Kohima district kübok Taxis aser tanga Commercial garitem

nem requisition order agütsüogoo, ta DC aser DEO Kohima Kumar Ramnikant IAS-i metetdaksü.

Iba dak sendakba nung election mapa balala atema shimmer aliba gari kibur/gari anirtem dang April 15 nü tamakok maludaksü IG stadium tonga arutsü DC-i tetuyuba agütsüogoo.

IND candidate Hayithung-i NBCC indang CEM pusemer

Dimapur, Rongchii/April 13 (TYO): Nagaland Lok Sabha Constituency atema Independent candidate Hayithung Bill Lotha-i, Nagaland Baptist Church Coucil (NBCC) indang Clean Election Movement (CEM) aser parnoki taruba election atema ghonda 152 chain of prayer ayongzüka pusemba sangdongogoo.

Honibarnü sangdong ka ajanga Lotha-i ashiba agi, election shia kin kidong, yimtsü tzükong dak ajemdaker lemdangba, tashi amshiba, electoral coup/booth tashiyim agi amokbangba, yi aser temesepba mozü talobusa amshiba, vote alizükba aser sen tashi amshiba lir, koba Khrista tamangba yimsü tamendakdak anema lir. Ibayongji pai CEM-i, Tsüngrem akümstüba vote shisa ka-a agütsütsü aser shitak aser ti shimtsü atema Tsüngremi shisatsü agütsür aliba amshitsü ayongzüka pusemer, ta ashi.

Janata Dal (United)-i, NBCC-CEM tayongzüba anema jembiba dak sendakba nung Hayithung Lotha-i, iba taitsüba ajanga JD (U) pur aser yimjak nung NBCC anemba political party tem shisatsü mainba, taktsü mapa aser inyakyim meshidakba sayur, kechiyong NBCC ya state nung Khrista dak amakba lokti tentet temaba lir koba Nagaland nung aliba Khrista dak amangertemi kanga akümstübur, ta ashi.

Reverend, pastor aser Arogo nung tenzükertemi 2023 State General election mapang tasa balala amshia



Hayithung Bill Lotha

asir yimjak nung candidate kar mesüra political party kar pusemba atema JD (U)-i parnok aitsüba indang jembiba mapang Lotha-i ashiba agi, "constitutional democracy ka nung lisopur ajaki political party mashi ka nungi pei mulungba candidate pusemstü, parnok atema nüböyimtsütsü aser vote agütsütsü temeden lir."

Tera kanga junga yanga aliba United States of America amala democratic linük indang tateshitsü bener arua jembiba mapang pai, iba amala linük nung Tir-i parnok indang Ecclesiastical/Spiritual Advisor asütsü atema reverend/pastor tem shimba lemsatop aser US Tir asem kübok Rev. Billy Graham official Advisor ama inyakba indang shisema liasü.

Independent candidate yagisa nübür ajak dang NBCC-i taruba 2024 Parliamentary Lok Sabha Elections atema ghonda 152 Chain of Prayer ayongzüka nung sarasadema shilem agitsü ayongzüka liasü.

RJD-i taruba Lok Sabha election atema party manifesto saya



April 13, 2024 nü Patna nung RJD lenir, Tejashwi Yadav den party lenirtemi taruba Lok Sabha election atema 'Parivartan Patra' sayadang tangokba noksa nung angur.

Patna, April 13 (Agencies): Bihar nung Mahagathbandhan teloktep nung party tuluba, RJD-i taruba Lok Sabha election atema party manifesto sayaogo.

Honibarnü RJD-i sayaba manifesto nungji linük nung nisung crore 1 nem sorkar mapa agütsütsü aser Raksha Bandhan anogo nungi tenzüka sensaker kibongtem nungi tetsürtem nem küm shia lakh kaka agütsütsü nangzüka lir.

RJD manifesto 'Parivartan Patra' sayaba sentong nung jembidang taoba mapang Bihar deputy chief minister, Tejashwi Yadav-i, party-i nüburtem dang

onük 24 nangzüker aser tenanzükba ajakji onoki ataloktsütsü, ta metetdaksü.

"Centre nung INDIA teloktepi sorkar kümra linük nung mapa mangur lanur crore 1 nem sorkar mapa agütsütsü atema RJD-i inyaksü. Iba maparenji taküm Independence Day nü tenzüksü. Ibaji mapa mangurtem atema nüchiso ama asütsü," ta pai metetdaksü.

"Asen tsükchir tulutibaji mapa manguba tebilemtsü ya lir, saka BJP lenirtemi kodanga iba indangji mejembir. Parnoki mapa crore 2 nangzüka liasü. Ajisüaka onokibo nangzüka ama inyaker," ta pai

metetdaksü.

RJD-isa sorkar mapa inyakerem nem Old Pension Scheme agütsütsü, LPG cylinders sen 500 agi agütsütsü, state kübok yimti balala nung airport tasen amenoktsü, state nung lenla ajak renloktsü atema sen 1.60 lakh crore lemezüktsütsü aser Bihar nung alirtem nem ita shia electricity unit 200 angati agütsütsü nangzüker.

RJD-isa, Centre nung INDIA teloktepi sorkar kümra Agniveer scheme anentsütsü, ta nangzüker.

Bihar nung Lok Sabha menden 40 atema election shilem tenet lemsar agütsü.

India nunger 17 densema aliba rong ka Iran sepaitemi puogo

New Delhi, Rongchii/April 13 (Agencies): Israel den tesendaktep aliba rong ka nung India nunger 17 densema nisung 25 lia Iran nunger sepaitemi puogo; rongji United Arab Emirates tzüyinkümlen aliba mapang nung apu.

"Khu abenba rong 'MSC Aries' ji Iran-i apuba onoki jangjaogo. Rong nungji India nungera 17 densema liasü ta osang angazüker. Onoki ketdangsertem ajanga Iran ketdangsertem den tongtepratepdar. India nungertemji kümzüka alitsü aser tekaraba nung parnok ajak chioksü atema onoki Tehran aser Delhi naprongla nung ketdangsertem den

tongtepratepdar," ta ketdangsertemi sangdong ka ajanga metetdaksü.

Rongji Islamic Revolutionary Guard Corps (IRGC) sepaitemi apu. Tawa Israel-i anünglen nungi Syria nung Iran consulate amakba mapang nung IRGC general ana densema züngsem tenet asü.

"Tang rongji tzüyim nung ozü linük tzütsüleni anir arudar," ta Iran nung osangkaket ka ajanga metetdaksü.

Rongji London nung amenoka aliba Zodiac Maritime den sendaktepa lir aser Israel nung Eyal Ofer aser par kibong indang Zodiac Group shilem ka lir. IRGC sepaitemji helicopter ka nungi lisü ajanga rong jagi alua liasü.

Israel-i Syria nung Iran nung consulate amakba sülen Iran-i mangyangtsü akok, ta bilema US sepaitem aika Middle East-i yokdar.

Iran aser Israel na tsüngda rara tenzüka ajanga Middle East nung rara tulu adoktsüa akok ta bilemer.

Yaküm October 7 nü Hamas teloki Israel amakba sülen nungi US-i Israel nem bomb aser raraba hadir aika agütsüogo; aser iba atemaji alima linüktemi US aitsür.

Israel-i Iran sepaitem amakba dak sendakba nung US Tir Joe Biden-i, kobi melii Iran-i mangyangtsüa akok, aser US-i maneni Israel pusemstsü, ta sangdongogo.

MEA-i US nung India nunger kaketshirtem den yariteptsü

New Delhi, April 13 (Agencies): Taküm United States nung India nunger kaketshir aika asüba dak sendakba nung Ministry of External Affairs (MEA)-i, sorkari US nung India nunger kaketshirtem den tongtepratepa teyari agütsütsü atema inyakdar, ta metetdaksü.

MEA-i, "United States nung tia maka tatalokba balala ajanga India nung kaketshirtem asür. Item tatalokbatem bushisüngdangdar. Indian Embassy aser consulates-i akokba tashi yaritepdar," ta metetdaksü.

"Item ama tatalokbatem ken oji US ketdangsertem nem metetdakja ochi temedem meshidar. Onokisa asen kaketshirtem lenitsü atema maparen inyakdar, iba denji

külemi embassy aser consulates-i mapang ajak nung parnok den yariteptsü ta parnok nem metetdaksütsü," ta MEA-i ashi.

Taküm küm tenzüker tang tashi nung US nung India nung aser Indian-origin kaketshir 11 süadokogo. Tan hopta tetenzüklena Hyderabad nungi arrshi küm 25 kaketshir ka US nung asü.

Yaküm Mohammad Abdul Arfath-i Cleveland State University nung Master Degree agütsü atema US-i oa liasü aser tan hopta tetenzüklen pa tasü mang angu.

2022-23 kümsük nung India nung kaketshir lakh 2.6 United States-i oa liasü, aser ibaji 2021-22 kümsük den medemdangra kaketshir shilem 35 agi teimba US-i aoba liasü.



April 13, 2024 nü New Delhi nung anogo ananü 'Technology and Judicial Dialogue' conference nung Chief Justice of India, D Y Chandrachud aser Chief Justice of Singapore, Sundaresh Menon na tangokba noksa nung angur.

Onoki taoba election dang nungi tang menden teimba angutsü: Chidambaram

New Delhi, April 13 (Agencies): Congress-i 2019 küm Lok Sabha election dang nungi taküm election nung menden teimba angutsü, ta Honibarnü party lenir, P Chidambaram-i ashi.

Taoba mapang Union Minister Chidambaram-isa, opposition INDIA teloktepi Tamil Nadu nung takok tulu angutsü, ta ashi.

Interview ka nung jembidang Chidambaram-i, "Ni state ajak atema mejembitetsü, ajisüaka INDIA teloktepi Tamil Nadu nung takok tulu angutsü ta ni asadanteter. Kerala nung front anati (UDF aser LDF) menden 20 lemsar angutsü aser Haryana, Uttar Pradesh, Bihar, Jharkhand den Delhi nunga menden aika angutsü aser BJP nem kecha anünga meyütsütsü. Karnataka aser Telangana na nung Congress sorkartem junga lir aser Congress-i 2019 küm dang nungi taküm menden teimba angutsü," ta metetdaksü.

2019 küm Lok Sabha elections nung Congress-i menden 52 nung dang takok ngua liasü.

Chidambaram-isa, West Bengal Chief Minister aser TMC tongti lenir Mamata Banerjee-i Lok Sabha election nung tongti shilem agütsü, aser

lar state nung lar party jenjang junga aliba agi INDIA teloktep tashi itdaksütsü, ta ashi.

Paisa, BJP-i Opposition ya Hindu anemertem ama aser Ato kilonser Narendra Modi ya Hindu nung kümzüker ka ama sayütsü meranger, ta ashi.

"Hindu yimsü ya lendong nung mali. Narendra Modi-i Hindu nungertem dang maliba tetsüba ka imdangi arudaksütsü meranger," ta pai ashi.

Kachchatheevu ken o dak sendakba nung Congress Rajya Sabha MP, Chidambaram-i, iba ya shibangadoker aliba ken o ka lir; kechiba election mapang ka nung ang BJP-i iba ken o kakteter?" ta asüngdang.

Chidambaram-i, BJP-i yimtenren aser election dak sendakba nung iba ken o ya kakteter aser iba ya China sepaitemi India litsü atsünga agiba onük nungi nüburtem piladaksütsü atema lir, ta metetdaksü.

"Kachchatheevu ya shibangadoker aliba ken o ka lir. Küm 50 tejaklen iba atema tezüngzüktep agia liasü. 2014 küm nungi Modi sorkar lir, süra kechiba tesüiba küm 10 tsüngda pai iba ken o mesüok? Tang China sepaitemi India nung litsü atsünga agiba agi parnoki tang iba ken o süoker," ta paisa shisem.



New Delhi, April 13, 2024: Lok Sabha election nung Other Backward Classes (OBC) organisation aikati Indian National Developmental Inclusive Alliance (INDIA) teloktep pusemstsü ta sangdongba sülen Congress Tir, Mallikarjun Kharge aser party lenir K.C. Venugopal nati osangbenertem den jembidang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, APRIL (RONGCHII) 14, 2024

Yisu dangi anir aruba

Ken mapang nisung ka kanga mejungi shirang, anungji taneptsü bushia doctor ka dangi ao aser iba doctor jagi pa nem mozü agütsü aser iba jagi pa mapang tatsüka tsungda anepadok. Iba sülenbo, iba nisungba jagi kodangsa shiranger ajurur, pai jet ta shiranger nisungji kasa doctor dangi anir arua anepaludaktsü aser yamaji pa anepba ama tangartemjia anep. Yisu sülen anidaker aser Pa dak amanger Khristan kati tangar ka Yisu dangi anir aruba mapaji ibaji mesüka lir. Laishiba nung asenok mulung adangtsüsa aser temoatsü angutsüsa mesüra jilu ajizüka benshitsüsa nisung taküm jakla yimya aser taküm otsü aika agüja lir. Itemji tezünngütsüka aser asenok tanüla taküm asoshi tashi aser temoatsü angudakji item taküm otsütemji lir. Aji oda, akhi tejen mapang alima nung alir ajungai temenen mapa benshiba putu ka nung Noah-bo temeshi nisung liasü. Yamaji, aiben Tsüngremi maginütsüsa inyakaka, David dang Tsüngremi mulung lemteta liasü. Aji oda, Yisu nütsüngtem rongnunga mit tema nung bena alisangji Peter liasü aser Yisui Yohan kanga meim, saka Iskariot Yihudabo tashioktsür aküm aser kecha metsübu yimjak nung Yisu kuli süa senzüsangji Paul liasü. Item ama Laishiba nung shia aliba nisung takümtem rongnung asenoki jungjunga repranga pa amaji inyaktsü merangtsüsa nisung ka lir aser paji Andrew liasü. Laishiba nung Yisu nütsüng Andrew yagi sayutsüngiba mesüra tangar aneptsüba mesüra sayatenya mapa tulu inyakba shia mangur. Tangar par medemertem ama pai kaketa mezülu aser medemertem dang tuluba asütsüa memerang. Pai mapa ka dang inyaka Yisu sülen anidak.. Ibaji tangartem Yisu dangi anir aruba mapa liasü. Pai tangar dang Yisu indang jungjunga rateta mashi saka pai parnokji Yisu tonga anir arur Yisu nem dang bendanga agütsü. Andrew-i mezüng Yisu dangi anir arusangji pa tedi (Simon) Peter liasü (Yohan 1:41). Aji oda, kodang Andrew ajanga Peter-i Yisu ajuru, pa nembo idangyongjisa Yisui tenünga tasen ka agütsü. Iba anogo nung jagi tenzüka par nütsüng terana rongnung Peter ya kanga tongtibang nisung ka aküm. Yisua Andrew dangbo Peter dak tesaklokba aser mulung telemtetba amato mapa aika nung amshi. Ibayongji Yisu nütsüngtem rongnunga Andrew masü saka Peter-ang nungtuguba aküm. Ajisüaka, Andrew-i tedi dak tenük memerem aser Yisu dang mejashi. Andrew-i pa nem agütsüba sempet aser Yisu nütsüng asütsü shimtetba nükjidong meteta dang liasü. Andrew mapa ajak agi Yisu ajurunertem Pa dangi anir arua ajurutepdaktsüsbaji liasü. Ibayongji, lokti ayaba mapanga parnok tebok süngdaktsütsü asoshi amtsük pongo aser ango ana bena alisang tanubosangtoa Andrew-iang Yisu dangi anir aru.(Yohan 6:8-9). Ibaji dang masü saka Yisu ajurunür Greek nungertema dena Andrew-i Yisu dangi anir aruba otsü asenoki angur. Asenok aikati tangar Yisu dangi anir arutsübaji asenoki sayutsüngiba ajanga dang anir arutsü ama billemer. Tangari asenok tsüngdang Yisui pei taküm nung Kibur aser kümtetdakba ta nangzükdaktsütet nung dang Yisu dangi anir arua amai bilemer. Aji oda, asenoki limapur ka anir arua tzü nung tzüsentsür arogo nung kümdaktsüsbaji dang Yisu dangi anir aru ama bilemetsüa akok. Ajisüaka, asenokbo Andrew dak nungti tatishitsü tuluka agidi. Andrew-i tedi Simon dang Yisu dak amangtsü mashi, amtsük pongo aser ango ana bena alisang tanubosang danga pai Yisu otsü mashi, Greek nung Yisu ajurunüa bushirtem dang parnoki kechiba Pa ajuruner, kecha mapang endoka mashishitep. Pai parnok ajakji Yisu tsüngdangji bener arua ajurutepdaktsü. Aji oda, Yisu majurudangba nisung ka temulung meyipdaktsüsbaji aseni makoktsüa akok saka asenoki nisung ka asen kümzüka Yisu tsüngdang anir oagibo toktsütettsü. Asenok Yisu majurudang shisaboluba, timatamba aser mepelatetba ama asen meketa nisung aika lir, item rongnungji kabosa asenokia asen aneptsüsang doctor dangi anir oa toktsüba ama toktsütettsü. Asenok mapaji tangar Yisu dangi anir aotsü aser parnok denjibo parnok nungdak yari Pai jembitsü.

OLEMSABANG NAGA KIN LIA ARUBA

~ M.Meren Ex.Pastor Ungma

(Yashi adok nungi...)

INDIA NUNGERTEMI NAGA NUNGER DAK AJITETBA

Naga nungger taginüba kechi aser parnok nükjitongji kechi aji kanga junga ajitet aser ashi, Naga nungger nem yi aser sen agüjang aji süra India tebilemetsü akaba ajak idakji tebangtsü ta parnoki ngutet, anungji Naga lima State nguli nungi Naga lima dangi yi Otalubusa yok aser State dak malangba sen agütsü, iba sang ana nungji Naga nungger ajak asongoka ai aser joko idak nung jagi Naga nungger atoktsü makoker.

Nagaland State joko küm 60 tema südagi joko kanga tambur kümdagi, saka tanü tashi Naga lima kechi tia nung lir? Naga lima State sülenang anguba tangar Statetem alima ajak tesüngmangtsü renloka kümogo saka Naga lima kechi tia nung lir? Naga lima anüdoklen aliba kintemi Nagaland State nung metenli ta ayimtenbaji kechiba? Parnok tangutsü tim manguba ajanga, tagütsütsü tim magütsüba ajanga, parnok tim teyaritsü meyaritetba ajanga parnok molung korema iba State nung ali tashibo teti yamai dang nemtoka yutsütsü ta shisatetba ajanga tanü yamai ataloker asütsüa shibai metet. Naga lima par anüdoklen aliba kintem dang masü saka Naga yimtsüng ajunga tepetzük tia nung lir masü no? pei nüja kibo Town ajunga nung anüng tashi ajungketa yanglutena lir saka reprangang alima tia aser nübur tekübok tia nung alirtembo ajaklen aiatai tia nung lir. Saka ano ki tajung yanglutena yur kiburbo süadoker mali timba, koda asü? Yi agi jemseta asü, aya ki tajung, aser tangari manguba rongsen tulu yutsür oadok ta yamaji metemji ataloka arur, kechiyong asenoki yi aser sen onsara meim anungji iba jagi nisung tajung aser atura jenti tepsetogo. Centeri senyokba apibo Naga lima ajunga Marbel agi menokbanger alitsüba aser Sorkar kitema yangtang ki ama yangerteter akatsüba, Industry agi Naga lima sünger alitsüba, Farm tajung agi Naga lima sünga akatsüba, saka sungulemba tilaba nungi tuluba tashi Assam indangbena achir, Metsü-mersü Assam nungi dang bena achir, Ak, Nashi, An aser Ango Assam nungi dang bena achir, Naga lima nung Ango tzübo atema sen agizüka agiba apibo Naga nungger kijaibo Angoji mechimatsüsa senbo agizüka agiogo ta jembir, saka Naga lima nung Akong kata mali, senbo agizüka chimar aser alimabo tazüng, asen Aortem pi kin danga aka bilemetsübato?

MUNG DANG ASER AROGO OLA MAKA

Center nungi yi onsara yokba ajanga Naga nungger ajak rongseta sümaogo, anungji yi ya nokdangdi ta ser Mungdang aser Arogotemi tesüngmangtsü meranga Sorkar den rara aruba 1989 nung takok ngua Total prohibition Act passed asü aser Naga lima Dry State aküm. Saka tanü Naga nungger kechi tia nunglir? Taoba mapang dang nungi tang yi agi jemseta asüba timba ataloker masü no? Aser shibabo majemer ali? Arogo menden nung alirtema merükteta lir ta shibaibo shitettsü? Aser Dry Statebo meshizüka yutsür joko Mungdang aser Arogotem nung teka jila adoker joko kinük-kisang ajak nung yi mangudak maka aser gate ajak nung tanükertemi yi amena bener gate ajanga free yoker, kechiba alima dang Nagalandbo Dry State ta sangdonger? Ibai alima tsüngdang koda maksü tulu? Tawa March ita nungto Bhandari check post ajanger K.M. 2 shi or Lotha Hoho, Lotha Students Union, NGO aser Womentem longjemer cari ana sota 8:00. A.M. shi nung reprang nung Cari ana nungji yi 1490 case ngutet. Aser gate anüker dang kechiba yi paikati bener gate ajangdaktsü ta asüngdang nung High Authority nungi check tesü ta osang aruba ajanga onoki lapoka mereprang yok ta langzüba angur. Sürabang Assam nungi Cari nung yi sünga bener kwiben ajanga atur alitsü ta bilemer? Kechiba Christian State menja apunger atsükshishir? Anungji Dry State ya asaya menütsü mapa ka kümogo, asenok khristiantem kechiba Tsüngrem den asayateper? Anungji Dry State ya meyipa agüjadoktsüla, kechiyong ya ajanga takokba lenmang tila kata mali saka Mungdanga aibelener aser Arogoa aibelener aser amangbapur aika ya ajanga temenen memenar mali aser check post nung sen angutsü temelatiba ta nüburi jembir. Bhandari check post ajanger ken dang check asü nung yi case paikaji ngutetbaji koda? aser tanga mapang nunga koda? Aser Nagalandi atuba lenmangji Bhandari lenmangji dang masü saka Assam nungi Nagalandi atuba lenmangji aika lirto, item nungjia koda? Saka yi jemnertembo Assami lua jemkanga jemer asü yonga kecha maliato? Pai sünerjito shibai nokdangtsü, yi ajemer ajunga jema alidang shibaibo marokji rakzüka yutettsü? Saka Mungdang aser Arogotembo temenen ojang menadi arungma. Kechiyong Tsüngrem dang azüngashia Dry State akümtsü nangzük saka meinyakteter, anungji Tsüngrem mesüshiba temenenji kanga tulu lir.

Ano kechi atema "Nagaland for Christ" ta declared asü? India telongtet nung tamajungtiba teraksa tulutiba Stateji Nagaland ta jembir masü no? India nung State aika nung Nagaland dang masü saka tangar State-a Christian majority lirto saka parnokbo kechiba Christian State ta majar? Aser Koba Sorkari Khristiantem kanga arishir iba Sorkarji BJP ya masü no? saka pa jakdang ajanga aruba Sorkartemibo Christian rishikangshia aruba otsü nung tatalokba jembia aruba mali saka tanü teinyakdak Sorkar yagi asenok Christian State aika nung kanga rishikangshiba angashia arur masü no? aser Tangar State aser tangar Mungdangtemibo ola agütsüba angashir saka NAGALAND FOR CHRIST aser Talisa Ao lima nungbo kecha ola mangashirato? Anungji Nagaland for Christ ya kanga tang taktsü ka masü no? asenoki Nagaland artsü atener tanular wadangbo kanga takok ngua inyakteper aji kanga junger saka pei lima nungbo teshinem menemba agi sünga kümogo anungji asen lima nung kechi tesembatsü aka ya tama merütsü merangtsüla. Naga nunggeri sen tali meimer ta asüba kuli tulutibajibo "Nagaland for Christ" ta ajaba linük yagi Khrista anemer tulutiba BJP sapuba ya asütsü. Tanga Statetem nung Tenla ki rongtokja, tamangertem pua rishikangshia tepsetba ama Christian State Nagaland yagi iba amaji tekangshi arunung shibaibo Khrista asoshi azü agi tenlatsüaka? Tang yimjung mapang sen arishia BJP nung senoka ia Christian State aser Nagaland for Christ ta sangdongba lima nung RSS aser BJP longjemer Nagaland Christian Stateji Hindu lima kümdaktsütsü asoshi rishikangshi tenzük nung shibaibo Hindu makümtsü? Iba mapang nungjibo tamanger ajak Hindu asütsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

Nepal nung Khristantem densema minorities shisabulu tenzükogo



April 09, 2024 nü Nepal yimtiba, Kathmandu nung Rastriya Prajatantra Party (RPP) züngsemtem. Nepal nung secularism agienba sülen 'Hindu linük' ta sangdongtsü atema takhangba agüja longkak aيتدang tangokba noksa nung angur.

April 13, 2024: Nepal nung Hindu yimsü alia amangertemi linük nung secularism agienba sülen 'Hindu linük' ta sangdongtsü atema akhangba agi Khristantem densema minorities shisabulu tenzükogo.

April 9, 2024 nü Hindu yimsü alia amangertem meyrjang aika linük yimtiba, Kathmandu-i oa Nepal ya Hindu linük, ta sangdongtsü atema takhangba agütsü.

Iba sentongji Hindu nationalist Rastriya Prajatantra Party (RPP)-i ayongzüka liasü. RPP ya Nepal Parliament nung party tulutibatem rongnung jenjang 5buba nung lir. April 9 nü iba takhangba agüja longkak aيتدem aser security sepaitem tsüngda rara adoka liasü.

Nepal Christian Society (NCS) nung coordinator, BP

Khanal-i, "Linük sensotem nem tamangba yimsü temeden aser sobaliba temedentem agütsüba wazüka ayutsüpurtemi iba ama takhangba agütsüba ya kanga tia maka," ta ashi.

Osang angazükba agi, India nung Hindu teloktemi ajungmesoa Nepal nung Hindu yimsü alia amangertemi Nepal ya Hindu linük, ta sangdongtsü atema akhanger.

Yaküm August ita nunga anüdoklen Nepal kübok Dharan jila anasa yimtsüng ka nung lisopurtemi nashishi achi, ta tai tonglokja lisopur Khristantem anema inyaka liasü.

Khristantemi nashi shi achiba indang video ka social media nung prokshiba sülen Nepal nung Arogo amak aser pastor den Khristan kar yirua

liasü.

Nepal nung Hindu yimsü alia amangertemi Muslim nungertem anema inyaker, ta Nepal Muslim Women Welfare Society nung chairperson, Seema Khan-ia metetdaksü.

Osangbener den jembidang Khan-i, "Yimtenren lenirtemi tamangba yimsü nung ajemdaker voters ajungmesoa loktiliba nung testünap raksatsür," ta ashi.

October ita nung Sarlahi jila nunga Muslim nunger aser Hindu nunger na tsüngda rara liasü.

1768 küm nungi 2008 küm tashi Nepal ya Hindu yimli ka liasü saka tesülen secular linük aküm. 2015 küm Nepal linük temzüng ajanga iba linük ya secular, democratic, socialism aser federal democratic republican linük lir, ta sangdonga liasü.

September ita nung Pope Francis-i linük aika semdangtsü

April 12, 2024: Taküm September ita nung Pope Francis-i Indonesia, East Timor, Papua New Guinea aser Singapore linüktem semdangtsü, ta Hokolbarnü Vatican-i metetdaksü.

Pope Francis temang mejungi dang alir, ajisüaka pai tang mapang talangtiba linük aika sema senzütsü.

September 2 nungi September 13 tsüngda arrshi küm 87 Pope-i Jakarta, Indonesia; Port Moresby aser Vanimo, Papua New Guinea; Dili, East Timor aser Singapore semdangtsü.

Pope Francis lanur asüba mapang nung pa dak tepokpok ka indoka liasü aser mapang

shia pa temang nung menokmein ajurur. Yaküm-a pai Dubai semdangtsü sentong liasü saka temang mejungi akümba agi thinen.

Indonesia foreign ministry-ia Pope Francis-i par linük semdangtsü aliba osang sangdongogo. 2020 küm Pope-i Indonesia semdangtsü sentong liasü saka coronavirus wara ajanga thinen.

Indonesia foreign ministry-i sangdong ka ajanga, "Pope Francis-i Indonesia semdangtsü alibaji Indonesia nunger ajak atema kanga tongtumbang asütsü, Catholic Khristantem atema dang masü saka yimsü balala amanger ajak atema tongtumbang asütsü. Pai linük semdangba

ajanga taremzüktep, telongjem aser alima nung yimjung ajungkettsütsü imlar," ta metetdaksü.

Indonesia nung Muslim nunger nütsüng million 242 aser Khristan nütsüng million 29 shi lir. Khristantem rongnung million 8.5 bo Catholic lir.

East Timor linük nung nütsüng million 1.2 shi lir aser nütsüng shilem 97.6 bo Khristantem lir.

Taküm küm matemdangsa Pope Francis-i Belgium-a semdanga iba linük nungji Catholic University sentong ka nung adentsü.

Pope Francis-isa taküm pai par linük Argentina semdangtsü tebilemba lir, ta metetdaksüogo.

ANOGO ABEN TSÜNGREM DEN

KHRISTA NUNG TEPELA TEPERI

Saka tang ni ne dangi arur aser parnok pei sasa dak kü tepela teperi akümtsü asoshi alima nung jembir. ~Yohan 17:13

Tamanger taküm kaji ajak asoshi temoatsü taküm ka asütsüla. Yamaji asen taküm temoatsüba taküm sünüra ajak den jungtepa tajung benshia alitsüla. Alima dang Khristan ka ta kuli asütsübaji aika lir, saka tongtipangtiba aser tematiba kaji asen dak Khrista akaba ajanga sayur. Kodang asen dak Khrista lidir asenok teti tepela nung alitsü.

Yisui aiben pa nütsüngtem den Pa tepela parnok dak teperi akümtsü indang jembia lir. Nütsüngtem kodang parnokki Tsüngrem chir aser Yisu den külem senmanger ta metet pela liasü. Mapang ka ainer aser teimla makai liasü saka tangbo iba jenjang nungi chioka lir.

Tepelaji tanela süngjang rongnung ka lir (Galatia 5:22). Iba süngjang ne dak tangdakjang. Na kong lidir, kechi inyakdir aser koba amala tia ajanga odir oaka tepela ne dak lira iba jagi kechisarina ajak atendanga anitsü. Iba tepela na Tsüngrem den tesendaktep tajung ayuba ajanga lir. Zefania 3:17, nung yamai shia lir, "Kibuba ne Tsüngrem tashi tulusangi ne nem takok agütsütsü ne den lir, tepela agi pai ne madak pelaseta alitsü, pai pa temeim nung anisüngzüka alitsü, ne madak pai ken tena pelatsü."

Baptist lenirtemi Ukraine nung Khristantem yaritsü mepishir

Washington, April 13 Convention indang Ethics and Religious Liberty Commission nung taoba mapang tir Richard Land, Ukrainian Baptist Theological Seminary tir Yaroslav Pyzh aser Baptist Union of Ukraine tir, Valerii Antoniu nungeri sign süa lir.

Taküm February ita nung Senate-i Ukraine nem dollar sen billion 60 lezmüktsütsü agizüka liasü. Ajisüaka House nung Conservatives-ibo "America First" tangatetba nung Ukraine nem senotsü teyari agütsütsü memelungi Johnson office nungi agientsü amokmerener.

Interview ka nung jembidang Daniel Darling-i, "Pai (Johnson) atangji Ukraine yariner, ta ni bilemer, ajisüaka House nung züngsemtem tangatetba balala liromedemtsütsü atema pai onok nem telangzüba magütsür asütsüa akok," ta metetdaksü.

(Agencies): Southern Baptist lenirtemi shidi ka ajanga US House Speaker, Mike Johnson dang Ukraine nunger Khristantem yaritsü mepishi.

SBC's Southwestern Baptist Theological Seminary den tesendaktep aliba lenirtemi shidi ajanga Johnson dang, "Nai Ukraine yaritsü atema shisadangba mapang nung onoki nü dang Khristantema yaritsü mepishir. Russia sorkari Ukraine amaktsü telemtetba agiba aser iba rara ajanga Ukraine nung Baptist den tanga evangelical Khristantem mejungi kongshir," ta metetdaksü.

Hombarnü (April 8) agütsüba shidi nungji Southwestern Baptist Theological Seminary indang Land Center for Cultural Engagement director Daniel Darling, Southern Baptist

Odisha state nung auer telok kati Khristan putirtem amak

April 13, 2024: April 10, 2024 nü Odisha nung prangpong amer auer telok kati Catholic mission ka telungi ia Khristan putirtem amak aser tetsür tesayurtema amokmerenba sülen auya.

Jharsuguda district nung auer telok kati Bagdehi mission station amak. Iba mission kübok Society of Divine Word (SVD)-i ketdangsüba St.

Arnold Primary School densema lir.

Provincial superior, Anuranjan Bilung-i, "Auertem jagi insang aser chair amshia Khristan putirtem dak azük. Parnoki putirtem ket nungi phone rakzüka raksatsüba sülen lisü agi teka alenteper takdang ka nung shibanga ayu," ta metetdaksü.

April 12, 2024 nü

osangbenertem den jembidang putir Bilung-i, aonung 9:30 ako meta auer nisung 12 shi Catholic mission campus telungi aitba sülen putirtem, tesayurtem aser parnok kibongtem dak züka amokmeren aser sen 100,000 shi den sentioset balala aser mobile phone auyar ao, ta metetdaksü.

Tia kaa auertem jagi tesayur tetsürtem dakbo teka

mesangshi, ta paisa ashi. Tesülen putirtem aser tesayurtemji kümzüka anasa aliba Arogo indang dispensary kati anir oa yaria liasü.

"Parnok kanga aoksaogo aser anisüngzük nüngdaker," ta pai ashi.

Bilung-i, "Auertem jagi jelia asalentong yanglur amak asütsüa akok. Auertem Khristantemji teimbaka tribal rongnung karibo mission campus telung meteta ali asütsüa akok, ajisüaka onoki parnok maitsü ka danga mejangja, kechiyong parnok ajak sü agi tejak meibanger liasü," ta ashi.

Odisha nung nütsüng million 4 dak tema lir, ajisüaka state nung nütsüng shilem 2.77 shi dang Khristantem lir; Khristantemji teimbaka tribal nisungtem lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Sümangsürür

(n) zülüoli, rabalen, temulung maten (inattentive)

* Sümangsürür nembo ki nuka toktsüsüla masü.

Sümedem

(v) mulungtepa inyak, lirumedem (unanimous)

* Lanurtemi mapa ajak nung sümedema inyakba angur.

OLONG PAITEP # 6756

	1		2			3		4		5
6								7		
					8		9			
			10							
11										
				12						
13		14		15						16
17										18

TIPLÉN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S _____ - (4)
- 13. Yagi ajak ashioktsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. ___ hi - (3)
- 16. Akümüli nungi pilar - (3)

OLONG PAITEP # 6755 TELANGZÜBA

TIPLÉN :

- 3. Nütsüng, 4. tepela, 6. Tama,
- 8. Sүjak, 11. Mali, 12. Nisung,
- 13. Temzüng.

LANGTSÜNGLEN :

- 1. Tsüngsem, 2. Kotak, 3. Neptzü,
- 5. Atok, 7. Anepdang, 8. Süin,
- 9. Aonung, 10. Angur.

NAI-A YA METETTER MA

GHONDA 12 ASEMA OTSÜ TASEN



Odisha nungi arishi küm 34 tain Sumit Singh-i Guinness World Record ka ngutetogo aser ibaji manual treadmill ka nung khen danga maneni ghonda 12 asemba atema lir. Iba indang video ya Guinness World Records website nung upload asü aser parnoki record ji agizüka Sumit nem kulikaket ka agütsüogo.

Meghalaya nung Strawberry Festival amonger



Guwahati, April 13, 2024 (Agencies): April 12, 2024 nungi 'Meghalaya Strawberry Festival' tenzükogo aser iba benjungmong ya Sohliya, Umsning, Ri Bhoi, Iawpynsing, Nohron, East Khasi Hills, Kynktieh, Syntung, Darechikgre aser West Garo Hills nung tesem balala nung amonger. Meghalaya Tourism Commissioner and Secretary Vijay Kumar D-i iba benjung nungita yarir aser pai ashiba agi

Meghalaya nung tsüingsang-mopung ajungba aser aluyimertemi merangba ajanga strawberries kanga junga adoker. "Strawberry Festival amala sentong den tourism sendaktepba ajanga aluyimertem aser shishilembartem ajungketer. Taruba küm tsüingda 25-100 acres nung strawberry tsünütsü akok aser shishilembadak tajung ngutetra 500 acres tashi nung tsünütettsü. Iba ajang Meghalaya nung nübertem kanga ajangzüktsü"

ta Vijay Kumar-i ashi. "Meghalaya Tourism department-i benjung nung yaritepba aser takok ngudaktsüba atema kanga pelar" ta Sohliya nung village headman Ostander Lyngkhoi-i ashi. Northeast nung mezüng strawberry tsünütsü Lyngkhoi lir. Meghalaya Agriculture and Farmers' Welfare Department Secretary Isawanda Laloo-ia village headman aser Syntung nung dang pelaba metetdaksü. "Syntung nung tang mezüng atema strawberry festival amonger. Iba yimtsüng nung strawberry tsünütsü kanga tajung lir" ta Isawanda-i ashi. "Strawberry Festival ya Meghalaya nung product ka benjungtepba lir aser iba ya tajungba shishilembaa aotsü lenmang lir. Strawberries ya processed sütetra market nung jenjang tasakba agi yoktettsü" West Garo Hills Deputy Commissioner (DC) Jagdish Chelani-ia ashi.

Manipur Congress-i lendenlen central armed forces meshir

Imphal, April 13, 2024 (Agencies): April 12 nü Moirang nung public senden ka nung injang khaloktsüba sülen Manipur Pradesh Congress Committee (MPCC)-i lendenlen central armed forces mapa lemsüktsütsü metetdaksüogo. April 12 nikonngang 3:30 ako meta Phairenbam Mandop nung election dak sendakba sentong ka agidang iba lendong atalok. P. Sharatchandra Singh (Retd. IAS and Ex-MLA) lenisüba kübok 1-Inner Manipur Parliamentary Constituency Congress Party Candidate atema iba sentong ayongzüka liasü. Sentong nung nisung 400 nungi 500 shi ka aden aser

ajungbena memetetba nisungtemi telok dak injang khaloktsü. Idangji tesentepertem aoksatep aser jenshi. Injang khaloktsürtemisa tayongertem aser tesentepertem amokmeren aser senshitsu tetuyuba agüja liasü. Iba Election Interaction Programme nung adentsüpurtemji Girish Chodankar (AICC In-charge Manipur), K. Meghachandra (MLA and President, MPCC), O. Ibob Singh (MLA & Ex-Chief Minister and CLP Leader, Manipur), K. Ranjit Singh (MLA and Dy. CLP Leader), Th. Lokeshwar Singh (MLA and Party Chief Whip), Anil Tan (Minority In-charge, AICC),

Rajesh Sethi (Minority In-charge, AICC) aser Angomcha Bimol Akoijam (INC Candidate, 1-Inner Manipur Parliamentary Constituency) nung liasü. Tatalokba balala nung ajemdaker MPCC-i ozüng alema mapa inyakertem merenshitsu aser Manipur kübok lendenlen central armed police personnel mapa lemsüktsüba den security akangshitsu takhangba agütsüogo. Lok Sabha election nung lendong ataloktsü akok anungji voters aser candidates lendong nungi jenbua alitsü atema tetuyuba agüjang ta Manipur Pradesh Congress Committee (MPCC)-isa metetdaksü.

Indian Ambassador to Myanmar-i Mizoram Governor ajuru

Guwahati, April 13, 2024 (Agencies): Myanmar aser India tsüingda tesentaktep akangshitsu atema acting Indian Ambassador to Myanmar Abhay Thakur-i Mizoram Governor Governor Hari Babu Kambhampati den ajurutepogo. Hokolbarnü Mizoram Governor aser acting Indian Ambassador to Myanmar na

ajurutepba ya India aser Myanmar tsüingda shishilembabaren akangshitsu atema lir ta osang ajanga ashi. Tenaprongi India aser Myanmar tsüingda shishilembabaren tajungba inyaka aotsü onüktem lemsatep. Ambassador Thakur-i Governor Kambhampati den Indo-Myanmar trade atema tang

teinyakdak mapatem aser tarutsü sentongtem lemsatepa liasü. Ambassador Thakur-i G20 nung India presidency mapang Sous-Sherpa mapa inyaka liasü aser idangji pai international level nung India jenjang ajungketba lemsatep. Thakur-i April 29, 2024 nungi Indian Ambassador to Myanmar inyak tenzüktsü.

Assam kübok Karimganj district nung police-i Rs 20 crore alang drugs apuba sülen agiba noksa angur. KIA Seltos gari (AS/01/FK/2939) ka nung car Yaba süngjang lakh 1 bena aliba apu aser iba dak sendakba nung Abul Hasan aser Shaharul Islam na pua lir. Hasan ya Nagaland kübok Dimapur nung alir aser Margherita nung drug trafficking network nung pai tongti shilem agir ta Karimganj district SP Parth Pratim Das-i ashi.



Hezbollah-i Israel dak rocket aika khaloktsüogo

Beirut, Rongchii/April 13 (Agencies): Israel military-i Lebanon antiolentip nung tesem kar amakba atema telanzüba agüja Israel military indang artillery position tem dak rocket aika khaloktsüogo, ta Hezbollah-i ashi. Gaza nung rara tenzükba sülen Hezbollah puri Israel tang tesashiba makogo.

Iran den sendaktepa aliba Lebanon nung telok yagi Hokolbar aonung sangdong ka ajanga, parnoki Israel anütoklentip aser Israel-i atsünger aliba Golan Heights nung tsükchir indang artillery position tem dak Katyusha rocket tem khaloktsüogo, ta metetdaksü.

Rocket khaloktsü tenzükba sülen Israel anütoklentip nung Upper Galilee kübok tesem aika nung siren ola agüja liasü aser air defence missile temi Lebanon nungi yokba rocket tem khadanga liasü.

Israel military-i ashiba agi, Lebanon nungi rocket 40 khaloktsüba jangjaogo aser rocket tem kharbo khadangogo aser tanungba ya moapu nung tsüka liasü.

"Rocket aser drone aika amshia makokogo, koba Gaza nung rara tenzükba sülen tesem kar tesashitaba amakba asütsü," ta Al Jazeera osangbener Rory Challands-i occupied East Jerusalem nungi metetdaksü.

"Lendong nung nisung yiruba osangbo kecha mali," ta Israel military-i ashiba den parnoki

Lebanon nungi Hezbollah puri Hokolbar aonung menor yokba bomb bena aliba drone ana khazüka yokogo, ta shisem.

Hezbollah ya Palestine nung telok Hamas den longjemer lir aser October 7 nü Gaza nung rara tenzükba sülen, arrtsü adena Israel nung sepai aser Hezbollah pur anogoshia amai khatepa arudar. Iba telok yagi ashiba agi, Gaza nung ceasefire benokba sülenang parnoki Israel amak anentsü.

Israel aser Hezbollah na tang tashi nungbo arrtsü nung aliba tesemtem nung dang raratepa arudar, ajisüaka raratep tali akümiba ajanga rara tuluba küma aotsü akok ta aikati tsübua bilemer.

Lebanon anüoletip kübok Tyre nungi Al Jazeera osangbener Ali Hashem-i ashiba agi, linük temeket nung mangatettep aliba dak ajemdaker Hezbollah puri Israel amakba ya tongtibang ama kümdaksür, saka koba tesem amaker ajia kanga tongtibang lir.

"Tang mangatettep adoker aliba mapang Golan amakba ya tanga mapang dang nungi balaka lir," ta paisa shisem.

Hashem-isa, iba ajanga iba mangatettep nung rules of engagement melenshia aoba sayur aser tesem balala tali amak tenzükba sülen civilian tem yiruba tali akümer aser military target tem aika dak kongshio. Iba mangatettep nung Israel aser Lebanon na

medemdangra Lebanon nung civilian 60 dak tema tepsetogo, ta ashi

Tensa mejungi küma aoba mapang ka nung Israel-i Honibarnü southeastern Lebanon nung tesem ka anüngen nungi makogo, koba Hezbollah pur tamendakdak tashitait ka lir, ta Hashem-i ashi.

Israel indang fighter jets temi Hezbollah puri achaayangba "military compound" tongtibang ka makogo, ta air force-i Honibarnü ashi.

Syria nung Iran indang consulate anüngen nungi maka Lebanon aser Syria nung inyakymtem achaayangba general ana densema sepai tenet tashi tepsetba sülen Iran-i Israel amaktsü akok tang bilema aliba mapang ka nung Hezbollah-i Israel makogo.

Israel indang military-i ashiba agi, Iran-i parnok makra parnok renema lir. Foreign Minister Israel Katz-i Iran dang, parnoki Israel amaktsü atema par litsü amshira Israel-i Iran dena amaktsü ta tekümdangtsü metetdaksüogo.

Israel indang Minister of Defense Yoav Gallant-i ashiba agi, ali aser anüngen nung Israel kümzüka ayutsü atema parnok indang partner (United States) den longjemer Israel renema lir.

"Minute shia tensa tamajungba küma aoer aser taruba jenjang kechi agitsü aji mejangjai ajak atepdar," ta Hashem-i ashi.

Lenir tasen shimtsü atema Haiti nung council ka amenokogo

Port-au-Prince, Rongchii/April 13 (Agencies): Haiti nung Ato Kilonser tasen ka amenoka ozüing alema inyaksangshiba teloktemi mepetmesü tulu adokdaksür aliba azüoktsü atema transitional council ka amenokogo.

Official gazette nung Hokolbarnü sangdong ka ajanga, Presidential Transitional Council ka tentetba sangdongogo. Ozüing alema inyaksangshiba teloktemi linük yimtiba Port-au-Prince nung tesem balala amak tenzükba sülen Ato Kilonser Ariel Henry-i pai mapa toktsütsü ta ashiba sülen ita ka lir tang iba council amenokogo.

Iba osang sangdongba sülen Henry-i tang tashi nung kecha telanzüba agüja mali aser Ato Kilonser tasen ka aser cabinet tem shimtsü atema züngsem teku agi kümtetba council inyakym tejangja aser parnok inyaksangshitsü atema mapang ka atakzüka metoktsüba ajanga iba council yagi koda takok ngua inyaksangshitsü iba indang tashishiba adoker.

Iba osang ajangsa council züngsemtem indang tenüngen mesangdong, ta Reuters news agency-i metetdaksü.

Reuters-isa, lokti tentet tasenbai Henry melener ka mesangdong tashi pa aser iba council yagi linük yimsüsüa

atatsü, ta ashi.

Caribbean Community and Common Market (CARICOM)-i sangdong ka ajanga, iba council nükjidojji Haiti nung tanaben democracy amenoktsü, linük meraket yanglushitsü aser linük tamendakdak aser sovereignty anokshir aliba yanglushitsü aser state institution tem junga inyaksangshi tenzükdaksütsü asoshi lir, ta ashi.

Kasa sangdong ajanga ashiba agi, ozüing alema inyaksangshiba teloktem den raratsü asoshi police nem teyari agütsütsü atema Henry-i 2022 küm mepeshiba ama international sepaitem takaratiba nung yokdaksütsü atema iba council yagi teyari agütsütsü.

Osang ajanga ashiba agi, iba council ya central Port-au-Prince nung National Palace nung amenoker inyaksangshitsü imlar, koba taoba hopta ishika tsüngda aiben makogo.

US Department of State otongdar Matthew Miller-ia iba jenjang agiba ya pelashishia agizükogo aser ashiba agi, iba ajanga tetsükdaksü kecha makai election sadem sadema agitsü atema lenmang lapoktsütsü, aser bendanger sepaitem yoktsü atema inyakym takaratiba nung benoka inyaksangshitsütsü.

Haiti Liberte osang kakat osangbener Kim Ives-i ashiba

agi, iba osang sangdongaka yimden yimsüsüba tsütsü mepetmesü adoker aliba bentettsü atema ano mapang talangka agitsü.

Haiti nung 2016 küm nungi tang tashi election khen danga agia mali aser 2021 küm Jovenel Moise tepsetba sülen Tir ka makai arudar.

February ita ozüing alema inyaksangshiba telok balalai linük nung tesem balala amak tenzükba mapang Henry ya international police force yokdaksütsü atema Kenya nung or liasü. Item teloktem yagi arishi küm 74 tain Henry ya mapa nungi anentsü khanga arudar.

Item teloktem yagi Haiti nung tepuokdak tuluba ana amakba sülen tepuoker 4000 shi jenaogo. Maneni parnoki Police station tem amakba den linük indang airport amakba ajanga Haiti ya tanga linüktem den tesendaktep makai aküm.

Azütokshi lendong tenzükba sülen linük yimtiba nungi nisung 95,000 shi jenaogo aser Haiti nungertem tenüngdakba osettem agi anüngba mapang ka lir, kechiyong rongnendak tongtibangtem shibangogo aser sorkari kecha jenjang magir.

Nütsünyongsük million 11 shi aliba linük nung nisung million 1 shi yawara agi meneptsü ana nung lir.

MOLUNGNEN O

Ni rara tajungji rarago, ni alizung tonga asemogo, ni tamangji yuogo. II Timoti 4: 7

Asür Yangjensangla Ao
9/1/1944 - 9/4/2024

Onoki teti meima aliba Ojala **Yangjensangla Ao**, akümüli wadang tembanga arudang, ana aser talang nungi kinungertem, kidang kimang, pur medemsortem yimtsür yimertem, Arogo aser lokti tentet bala nungi shirnokisa ozü den temeim agi lenla balala ajanga yaritepogo aser tang tashi nungita arudar, nenok ajak dang pelaba lemsateper.

Tanu ozüi tsüngdong arua, ajak tenüngen teta pelaba meshiteter, saka nenok mapa tajung Tsüngremi moatsütsü ozü tamang teimla akar.

**-Temeim kinungbo,
Chirnurtem, Semchirtem
aser Kinungertem**



AO MOATSÜ ONLINE SOLO CONTEST

ABOUT CONTEST

- Genre : Ao Folk Song.
- Language : Ao.
- Age Criteria : No Age Bar.
- Contestants should compose the song based on MOATSÜ.
- Contestants can use any instruments for accompaniment.
- Pre-recorded audio will not be entertained.
- Contestants can Whatsapp the recorded video on the given numbers below.
- Registration fees: Free Registration starts: 13th April 2024. Submission last Date: 25th April 2024.

WINNER AWARD


- Cash Price: Rs. 10,000/-
- Free Audio recording. Sponsored by Sunep Lemtur.
- Winner will perform on 2nd May 2024 during MOATSÜ FESTIVAL OPEN CONCERT.

CHUCHUYIMLANG MOATSÜ FESTIVAL OPEN CONCERT

Main Artist : Sunep Lemtur.
Date : 2nd May 2024.
Time : 06:00 Pm onward.
Venue : Anü Mai Amphitheatre, Chuchuyimlang.

For any queries and Submission of Song Videos"
Whatsapp: 7005649287 / 8729877877

Organised by: ASHIPO Society.



Russia Tir Vladimir Putin-i, Ukraine den sensaksemtsü atema pa renema aliba metetdaksüogo. Kremlin otongdar Dmitry Peskov-i ashiba agi, 2022 küm yimjung atema inyakym sensaksemtur aliba dak ajemdaker sensaksem tenzükshitsü. Brestbarnü Belarus Tir Alexander Lukashenko den sensaksemba mapang Putin-i yimjung atema sensaksem tenzükshitsü asoshi Moscow renema aliba lemsatepogo.

Paris Olympics boxing qualifier tatembangbuba atema Amit shimogo



Amit Panghal

Rongchii/April 13, 2024 (Agencies): World Championships nung silver medal ngur aliba asayar Amit Panghal, Indian squad nung züngoksemogo. Bangkok nung May 25 nungi June 2 nü tashi asayatsü aliba Olympic qualifiers tatembangbuba atema Boxing Federation of India (BFI)-i asayar trok tashi melenba sülen Panghal team nung züngoksemogo.

Taoba Olympic qualifier nung India nung boxer temi junga masayateti parnok rongnungi katidanga quota mongutetba sülen High Performance Director Bernard Dunne-i pa

mapa tokja liasü.

Bendanger coach Dmitry Dmitruk-i tawa asayartem asadangba sülen C.A. Kuttappa aser Dharmendra Yadav, 2023 World Championships bronze medallists Deepak Bhoria (51kg) aser Mohammad Hussamudin (57kg), asayar tejen Shiva Thapa (63.5kg) aser national championship tesüsabuba koker alisang Lakshya Chahar (80kg) nung team nungi tuguogo.

Panghal, shibai 2022 Commonwealth Games aser 2024 Strandja Memorial nung gold medal nguogo, pa

asayartem asadangba mapang Bhoria sülen tanabuba jenjang nungang tembanga liasü aser ibayongji pa Asian Games aser mezüngbuba World Olympic Qualifiers nung shilem magiteti liasü.

Tetsür asaya nung Ankushita Boro, shiba 66kg weight class nung asaya liasü, lai CWG bronze medallist Jaismine Lamboria akokba sülen 60kg category nungi asayatsü. Kasa mapang nung 66kg weight class nung national champion Arundhati Choudhary ajak dang temaba jenjang nung liasü.

India team-i tang tashi nung 2024 Olympic atema quota pezü nguteta lir. Nikhat Zareen (50kg), Preeti Pawar (54kg), Parveen Hooda (57kg) aser Lovlina Borgohain (75kg) nungeri taoba küm Asian Games asayaba mapang Paris atema quota nguteta liasü.

Tokyo Olympics nung India nung boxer tekui shilem agia liasü.

India team:

Tebur: Amit Panghal (51kg), Sachin Siwach Jr. (57kg), Abhinash Jamwal (63.5kg), Nishant Dev (71kg), Abhimanyu Loura (80kg), Sanjeet (92kg), Narender Berwal (+92kg)

Tetsür: Ankushita Boro (60kg), Arundhati Choudhary (66kg).

Olympic triple jump champion Rojas Paris Olympics nung masayatsü



Yulimar Rojas

Rongchii/April 13, 2024 (Agencies): Olympic nung tetsür triple jump asaya tesüsabuba koker aliba Yulimar Rojas-i Hokolbarnü ashiba agi, la Achilles tendon yiruogo aser taküm Paris Olympics nung masayatetsü.

Arishi küm 28 tain Venezuela tsür la yagi, la Spain nung training agiba mapang Achilles yiru aser Madrid nung Brehostibarnü surgery agiogo, ta ashi.

"Ni temulung kanga raksar aser Paris 2024 nung shilem magitetsüsa akümba atema taitokang," ta Rojas-i la indang social media account tem ajanga lemsatetp.

Iba osang den külemi la mozükidang yipden ka nung mejanger aliba indang noksa ka lai lemsatetpa liasü. Rojas-i

ashiba agi, la training nung jokshishiba mapang tetsüng nung tashiba ka ajangshi, koba tetsüng tabelen Achilles tendon yiruba liasü.

Rojas-i 2016 Rio Olympics nung silver medal angu aser 2021 küm Tokyo Games nung gold medal ngua liasü. Lai taoba küm Budapest nung outdoor world titles pezübuba kokogo. Iba asayamung nung la tatembangbuba ajokba mapang jenjang tibuba nung liasü, ajisüaka lai 15.08m jukteta gold medal ngua liasü.

Kasa mapang nung Rojas-i iba asaya nung otsü tasen ka yanglua lir. Lai 2022 küm 15.74m joka otsü tasen ka yangluogo. La nem taoba küm tetsür field events nung World Athlete of the Year naroküm agütsü aser la taküm Olympics


nung iba asaya nung gold medal angutsü imlar rongnung ka liasü.

"Ni Olympic title defend mesütetsüsa akümba atema nemjema bilemer, ajisüaka ni manentsüla; iba ya agizükteta taneptsü ngur tanaben tashitaitba arua asayatsü," ta Rojas-i ashi.

Paris Olympics ya July 26 nungi August 11 nü tashi asayatsü.

Venezuela nung Rojas ya kanga nungtugu lir. La tejak ya frescoes tulu, noksa aser commercials aika nung adoker. La ya Venezuela nungi tetsürtem rongnungi track and field nung mezüngbuba Olympic gold medal anguba asayar lir. Track and field nung nung Venezuela tsür kati danga tanga tashi nung gold medal ngua mali.

Novak-i otsüsütsüsa Monte Carlo nung 77buba Masters semi tongtetogo



Novak Djokovic

Rongchii/April 13, 2024 (Agencies): Hokolbarnü Monte Carlo Masters quarter final asaya nung Australia nung asayar Alex de Minaur akokba sülen Novak Djokovic otsüsütsüsa 77buba Masters semi-final tongtetogo aser kasa mapang nung tang kanga junga asaya aliba asayar Jannik Sinner-ia taküm asaya 25buba koka semifinal-i iogo.

Arishi küm 36 tain world number one asayar Djokovic-i quarter-final nung Minaur 7-5, 6-4 agi koka 2015 küm sülen tang mezüngbuba Monte Carlo Masters semifinal tongtetogo.

Djokovic ya Open Era nung Monte Carlo Masters semi-finals tongtetba asayar tambusang kümogo aser pa Deobarnü final nung jenjang ka asoshi Norway nung asayar Casper Ruud den semi-final asayatsü.

Maneni tebur kija asaya semifinal tanga ka nung Australian Open champion aser world number two asayar

Jannik Sinner aser Monte Carlo asayamung anaben koker aliba asayar Stefanos Tsitsipas na asayaba angutsü.

Quarter nung Sinner-i taküm otsüsütsüsa asaya 25buba koka 6-4, 6-7 (6/8), 6-3 agi 2023 küm iba asayamung runner-up Holger Rune kokogo. Sinner-i taküm asaya ka nung dang tamakok ngur lir.

Kasa mapang nung Greek nung asayar Tsitsipas-i tanga quarterfinal asaya ka nung Russia nung asayar Karen Khachanov 6-4, 6-2 agi kokogo.

Maneni eighth-seeded asayar Ruud-i France nung 14 seeded asayar Ugo Humbert 6-3, 4-6, 6-1 agi koka pa tang agi tanabenbuba Monte Carlo Masters semifinal tongtetogo.

Ruud aser Djokovic na tang tashi nung ponguben asayar lir aser ponguben prongla Djokovic-i kokogo, kong tapoba küm French Open final nung Serbia nung asayar yagi straight set nung asaya akokba densema lir.

Asian Wrestling Championships: Radhika final-i iogo

Rongchii/April 13, 2024 (Agencies): Bishkek (Kyrgyzstan) nung tang asaya aliba senior Asian Championships nung India tsür wrestler tem rongnungi Radhika-i 68kg category nung final tongteta medal kabosa angutsü jangjaogo. Lai tang agi tanabenbuba iba asayamung nung medal angutsü.

Radhika, shibai taoba küm U23 Asian Championships nung silver medal ngua liasü aser 2022 küma senior Asian Championships nung silver medal nguogo, lai Honibarnü semifinal asaya amokbanger asaya liasü.

Lai mezüngbuba bout nung Kazakhstan tsür Albina Kairgeldinova technical superiority agi akok aser iba sülen Kyrgyzstan tsür Gulnura Tashtanbekova koka liasü.

La gold medal bout nung Japan tsür Nonoka Ozaki den asayatsü.

Kasa mapang nung Shivani Pawar (50kg) quarterfinal nung 'by fall' agi Ziqi Feng-i akok ajisüaka China tsür la ya final-i aiba sülen la bronze medal round-i iogo.

55kg category nung Tamanna qualification round nung Moe Kiyooka-i 0-9 agi koka liasü tsüdaktsü.

Ajisüaka Japanese tsür la ya final-i aiba sülen India tsür la ya medal round nung asayatsü atema maongka ngutetogo.

Maneni India tsürtem rongnungi Pushpa Yadav (59kg) aser Priya (76kg) natia medal angutsü maongka lir, kechiyong tena tsükdaktsüba asayartem final tongtetogo aser iba ajanga tena nem lenmang lapoktsüogo.

BILEMDANGANG

"Tangar nem masü saka peisasa pei ajungmesoang."